

HSK PERLU DIPELIHARA

Penularan lokasi unik di kawasan rizab simpanan biasanya bawa kesan buruk

SANTAI

Oleh Nurul Husna Mahmud

nurul_husna@hmetro.com.my

Permata tersembunyi atau 'hidden gems' antara istilah sering digunakan bagi penemuan lokasi dengan tarikan unik.

Bagi peminat aktiviti luar atau pelancongan, berada di lokasi permata tersembunyi dan menjadi kumpulan terdahulu sampai antara satu kepuasan yang sukar digambarkan dengan kata-kata.

Tidak hairanlah jika ia dikongsi di media sosial, lokasi unik itu menarik perhatian peminat aktiviti luar untuk bergambar mahupun meneroka kawasan terbabit.

Namun kadang-kala penularannya mengundang budaya meneroka kawasan hutan itu dengan cara yang salah.

Sebagai contoh jika kawasan itu terletak dalam rizab kawasan Hutan Simpanan Kekal (HSK), tindakan mendedahkan

lokasi permata tersembunyi itu bukanlah sesuatu yang baik malah akan memberikan kesan buruk kepada kawasan lindungan.

Kebimbangan tindakan penularan kawasan tarikan seperti lokasi cantik boleh menjadi punca berlakunya pencerobohan hutan simpan.

Golongan yang kemungkinan kurang pengetahuan mengenai tertib dalam hutan boleh juga menjadi punca kerosakan kepada ekosistem hutan itu sendiri.

Hal itu turut didedahkan Pemelihara Hutan Simpan Ayer Hitam (HSAH) Mohd Farhan Shahrin, apabila kelestarian hutan itu yang terletak di Puchong, Selangor itu semakin terancam akibat budaya penularan lokasi permata tersembunyi.

Keinginan orang awam didorong menerusi visual keindahan lokasi itu ditonjolkan pada video atau gambar yang dimuat naik secara nyata.

"Kawasan lubuk kawah atau Blue Lagoon adalah



LAGUN biru menjadi buruan peminat lokasi tular.



SAMPAH dan mencantas pohon kayu bernilai tinggi antara kesan pencerobohan hutan

permata tersembunyi HSAH, yang lebih dikenali orang ramai sebagai Wawasan Hiking Trail atau Kinrara Hiking Trail.

"Kawasan ini ditutup untuk diakses namun tetap diceroboh individu yang tidak bertanggungjawab.

"Keinginan melihat lagun atau keindahan air sungai berwarna biru mengundang perhatian orang ramai meskipun dengan jelas kawasan itu diwartakan sebagai kawasan larangan dalam HSAH," katanya.

Mohd Farhan berkata, selain keindahannya, kawasan lagun biru itu juga boleh terancam dan sangat berbahaya kepada orang awam.

"Memang air sungai biru itu sangat cantik dan mengundang keinginan untuk cuba menerokainya.

"Namun larangan itu bersebab termasuklah risiko sungai itu tidak selamat untuk aktiviti rekreasi kerana mempunyai kedalaman hampir 6.1

meter dan pernah meragut nyawa," katanya.

Lokasi hutan yang berkeluasan 1,182 hektar yang dianugerahkan melalui perjanjian kepada Universiti Putra Malaysia (UPM) sebagai kawasan penyelidikan, pendidikan dan pengembangan bukanlah untuk aktiviti rekreasi.

"Hutan ini satu-satunya kawasan hijau yang masih 'hidup' dan wujud di kawasan Puchong.

"Ia memainkan peranan penting apabila menjadi agen penyerap karbon terbesar di Lembah Klang di sebalik pembangunan pesat bangunan konkrit.

"Sebagai golongan masyarakat HSAH itu seharusnya dilindungi kerana setiap segenap kawasannya memiliki ekosistem yang unik.

"Paling bernilai ialah flora dan fauna endemik yang perlu dijaga bagi mengekalkan kepelbagaian biologi serta mengelakkan tanah terus diancam



PAPAN tanda larang menceroboh.



HUTAN Simpan Ayer Hitam lokasi kajian.

pembangunan yang tidak terkawal," katanya.

Tambah Mohd Farhan berkata, 'aktiviti' pencerobohan kawasan terbabit sentiasa berlaku pada setiap hujung minggu dan musim cuti perayaan terutamanya melalui laluan atau jalan haram yang dibuka sendiri oleh penjelajah hutan perlu dihentikan.

"Kegiatan meneroka lokasi permata tersembunyi yang dilakukan akan menimbulkan kerosakan kepada hutan simpan kerana pokok hutan yang bernilai di kawasan itu dicantas untuk membina laluan buat si penjejak hutan.


"Apatah lagi, kualiti air di situ perlu dijaga dan

dikawal kerana aktiviti rekreasi tanpa kawalan menerusi pencerobohan menyebabkan air di situ berisiko tercemar dan menjadi punca kepada penyakit kencing tikus yang membahayakan pelajar yang melaksanakan kajian.

"Pencerobohan oleh orang awam selalunya meninggalkan sisa kotoran seperti sampah sarap dan unggun api.

"Itu menjejaskan usaha pengkaji dan penyelidik untuk terus menjalankan usaha memelihara khazanah alam," katanya.

Beliau turut memaklumkan hutan terbabit kaya dengan tumbuhan endemik bernilai tinggi seperti pokok merawan meranti.



PENDAKI perlukan permit dan kebenaran untuk melakukan aktiviti merentas atau mendaki hutan simpan.